



ՀԵՌՈՒՍՏԱՏԵՍՈՒԹՅԱՆ ԵՎ ՌԱԴԻՈՑԻ ՀԱՆՁՆԱԺՈՂՈՎ

ՈՐՈՇՈՒՄ

16 ապրիլի 2021 թվականի թիվ 54-Ա

ք. Երևան

«ՌԱԴԻՈ ԱՎՐՈՐԱ» ՄՊ ԸՆԿԵՐՈՒԹՅԱՆ ՆԿԱՏՄԱՄԲ ՀԱՐՈՒՑՎԱԾ ՎԱՐՉԱԿԱՆ ՎԱՐՈՒՅԹԸ ԿԱՐՃԵԼՈՒ ՄԱՍԻՆ

Հեռուստատեսության և ռադիոյի հանձնաժողովն (այսուհետ՝ Հանձնաժողով) ուսումնասիրելով 2021 թվականի մարտի 15-ին իր նախաձեռնությամբ հարուցված թիվ 3 վարչական վարույթի նյութերը՝ *պարզեց*.

Հանձնաժողովը «Տեսալսողական մեդիայի մասին» օրենքով (այսուհետ՝ Օրենք) վերապահված իր վերահսկողական գործառույթներն իրականացնելիս արձանագրել է լսողական մեդիաձառայություն մատուցող «ՌԱԴԻՈ ԱՎՐՈՐԱ» ՄՊ ընկերության (այսուհետ՝ Հեռարձակող) կողմից իր «Ռադիո Ավրորա» լսողական ծրագրի եթերում «Գովազդի մասին» օրենքով ամրագրված վիճակախաղերի գովազդի հեռարձակման սահմանափակումների խախտում:

Հանձնաժողովը ղեկավարվելով «Վարչարարության հիմունքների և վարչական վարույթի մասին» օրենքի 30-րդ հոդվածի 1-ին մասի բ) կետով՝ 2021 թվականի մարտի 15-ին Հեռարձակողի նկատմամբ հարուցել է վարչական վարույթ՝ հիմք ընդունելով Հանձնաժողովի կողմից մշտադիտարկման արդյունքում «Տեսալսողական մեդիաձառայություն մատուցողների և օպերատորների գործունեության մշտադիտարկման (ուղղակի դիտարկում իրականացնելու միջոցով) իրականացման և արդյունքների վերաբերյալ» 2021 թվականի մարտի 15-ին կազմված արձանագրությունը:

Հանձնաժողովի ծրագրերի մոնիտորինգի և վերահսկողության վարչության մոնիտորինգի բաժնի կողմից 2021 թվականի մարտի 15-ին իրականացվել է Հեռարձակողի գործունեության մշտադիտարկում՝ ուղղակի դիտարկում իրականացնելու միջոցով, որի արդյունքում 2021 թվականի մարտի 15-ին կազմվել է արձանագրություն: Համաձայն արձանագրության՝ 2021 թվականի մարտի 12-ի Հեռարձակողի եթերում հայտնաբերվել են հետևյալ խախտումները՝

«Լուրեր» լրատվականի ժամը 08:57:23-ի թողարկումից 6ր 27վ առաջ՝ ժամը 08:50:56-ին գովազդվել է «adjarabet սպորտ» վիճակախաղը.

«Լուրեր» լրատվականի ժամը 09:57:23-ի թողարկման ավարտից 3ր 30վ հետո՝ ժամը 10:10:13-ին, գովազդվել է «adjarabet.am»-ի «adjarashop» ակցիան.

«Լուրեր» լրատվականի ժամը 09:57:23-ի թողարկումից 7ր 54վ առաջ՝ ժամը 09:49:29-ին, գովազդվել է «Vivaro»-ի «Հաջողակ» շահումով խաղը.

«Լուրեր» լրատվականի ժամը 08:57:23--ի թողարկումից 5ր 20վ հետո՝ ժամը 09:09:43-ին, ժամը 11:57:22-ի թողարկումից 7ր12վ առաջ՝ ժամը 11:50:10-ին, գովազդվել է «Toto gaming.am»-ի «Դաբլ-Դուբլ» ակցիան.

«Լուրեր» լրատվականի ժամը 08:57:23-ի թողարկումից 8ր 14վ առաջ՝ ժամը 08:49:09-ին, ժամը 09:57:23-ի թողարկման ավարտից 5ր33վ հետո՝ ժամը 10:12:16-ին, ժամը 10:57:22-ի թողարկման ավարտից 7ր հետո՝ ժամը 12:09:48-ին, գովազդվել է «Goodwin.am»-ը՝ «PLAY @ win» սլոթ մրցաշարով:

Նշված ժամանակահատվածներում վերոնշյալ արարքները համապատասխանում են «Գովազդի մասին» օրենքի 15-րդ հոդվածի 13-րդ մասի հատկանիշներին:

Հանձնաժողովը հարուցված վարչական վարույթի մասին 2021 թվականի մարտի 17-ին ծանուցել է Հեռարձակողին և հայտնել, որ այս հարցի վերաբերյալ կարող են ներկայացնել իրենց պարզաբանումները, բացատրությունները, ինչպես նաև Հանձնաժողով ներկայացնել 2021 թվականի մարտի 12-ի եթերի ձայնագրությունը:

Հարուցված վարչական վարույթի ընթացքում Հեռարձակողը 2021 թվականի ապրիլի 08-ին Հանձնաժողով ներկայացրած իր պարզաբանումներում հայտնել է այն մասին, որ իրենց կողմից ուսումնասիրվել են սույն թվականի մարտի 11-ի և 12-ի եթերի ձայնագրությունները և պարզել, որ վիճակախաղի գովազդի հեռարձակումը տեղի է ունեցել լրատվական թողարկումից մոտավորապես 30-րդ րոպեին, այսինքն՝ լրատվական թողարկումից 20 րոպե ուշ և թե 20 րոպեից ավելի ուշ: Հեռարձակողն էլեկտրոնային նամակով Հանձնաժողով է ներկայացրել նաև եթերի ձայնագրությունը:

Վարչական վարույթի շրջանակներում Հեռարձակողի կողմից ներկայացված եթերի ձայնագրություններն ուսումնասիրվել են Հանձնաժողովի ծրագրերի մոնիտորինգի և վերահսկողության վարչության կողմից, այն համեմատվել է Հանձնաժողովում առկա ձայնագրության հետ և համեմատության արդյունքում պարզվել է, որ տեղի է ունեցել թերի հաշվարկ, որը պայմանավորված է եղել ձայնագրման համակարգի տեխնիկական խոտանով:

Հանձնաժողովի հիմնավորումները (պատճառաբանությունը) և եզրահանգումը.

Այսպիսով, վարչական վարույթի բազմակողմանի, լրիվ և օբյեկտիվ քննության, ձեռք բերված ապացույցների ուսումնասիրության և գնահատման արդյունքում Հանձնաժողովն ամրագրում է հետևյալը.

Օրենքի 13-րդ հոդվածի 3-րդ մասի համաձայն՝ Կարգավորող պետական մարմինը ընտրանքային սկզբունքով իրականացնում է Հեռարձակողների կողմից հեռարձակվող տեսալսողական տեղեկատվության մշտադիտարկումներ յուրաքանչյուր Հեռարձակողի համար ամսվա ընթացքում առնվազն հինգ օր: Մշտադիտարկման արդյունքները կարող են համադրվել հաշվառման էլեկտրոնային մատյանների տվյալներին:

Օրենքի 14-րդ հոդվածի 7-րդ մասը սահմանում է՝ Հեռարձակողների կողմից գովազդի հեռարձակումն իրականացվում է սույն օրենքի և «Գովազդի մասին» օրենքի պահանջներին համապատասխան:

Օրենքի 42-րդ հոդվածի 1-ին մասի համաձայն՝ Հեռարձակողների գործունեության մշտադիտարկումն իրականացվում է ուղղակի դիտարկման, իսկ օպերատորի

դեպքում՝ նաև տեղում դիտարկում իրականացնելու միջոցով, իսկ նույն հոդվածի 8-րդ և 9-րդ մասերը սահմանում են՝

«8. Մշտադիտարկման արդյունքներով կարգավորող պետական մարմնի ներկայացուցիչը մշտադիտարկման արդյունքների վերաբերյալ կազմում է արձանագրություն:

9. Մշտադիտարկման արդյունքների վերաբերյալ արձանագրության մեջ նշվում են մշտադիտարկման արդյունքների համառոտ շարադրանքը, ինչպես նաև վարչական վարույթ հարուցելու կամ հարուցված վարչական վարույթի համար էական նշանակություն ունեցող բոլոր փաստական հանգամանքները, այդ թվում՝ վարույթի մասնակիցների օգտին առկա հանգամանքները: Դիտարկման արդյունքների և տեսալսողական հաղորդումների հաշվառման էլեկտրոնային մատյանների տվյալների համադրման դեպքում մշտադիտարկման արդյունքների վերաբերյալ արձանագրության մեջ նշվում են նաև դիտարկման արդյունքների և տեսալսողական հաղորդումների հաշվառման էլեկտրոնային մատյանների տվյալների միջև անհամապատասխանությունը, անհամապատասխանությունների քանակը և տևողությունը»:

«Գովազդի մասին» օրենքի 15-րդ հոդվածի 13-րդ մասը սահմանում է.

«Արգելվում է վիճակախաղի գովազդումը լրատվական թողարկումների ընթացքում, դրանցից 20 րոպե առաջ և 20 րոպե հետո»:

Հանձնաժողովի կողմից ուսումնասիրվել են վարչական վարույթի ընթացքում ձեռք բերված և ներկայացված փաստերը, ուսումնասիրվել են Հեռարձակողի կողմից ներկայացված ձայնագրությունները, այդ ձայնագրությունները համեմատվել են Հանձնաժողովում առկա ձայնագրությունների հետ, որի արդյունքում հայտնի է դարձել, որ Հեռարձակողը վիճակախաղի գովազդի հեռարձակումն իրականացրել է լրատվական թողարկումից 30 րոպե հետո:

Այսպիսով՝ Հանձնաժողովը հաշվի առնելով այն փաստը, որ ձայնագրման համակարգի տեխնիկական խոտանով պայմանավորված՝ վերոնշյալ խախտումն արձանագրվել է թերի հաշվարկի պատճառով, այլ ոչ՝ Հեռարձակողի մեղքով, ուստի վերլուծելով և գնահատելով սույն գործի հետ կապված փաստական հանգամանքները, ամրագրում է, որ Հեռարձակողի նկատմամբ հարուցված թիվ 3 վարչական վարույթը ենթակա է կարճման:

«Վարչարարության հիմունքների և վարչական վարույթի մասին» օրենքի 50-րդ հոդվածի 2-րդ մասին բ) կետի համաձայն՝ վարչական մարմնի նախաձեռնությամբ հարուցված վարչական վարույթը կարող է կարճվել, եթե՝

բ) օրենքի կամ իրավական այլ ակտի պահանջների խախտումների կամ դրանց կանխման հետ չկապված հարցով իրավիճակի փոփոխման կամ օրենքով նախատեսված այլ հիմքով վերացել է վարչական ակտի ընդունման անհրաժեշտությունը:

Ելնելով վերոգրյալից և ղեկավարվելով «Տեսալսողական մեդիայի մասին» օրենքի 14-րդ հոդվածի 7-րդ մասով, «Գովազդի մասին» օրենքի 15-րդ հոդվածի 13-րդ մասով և հիմք ընդունելով «Վարչարարության հիմունքների և վարչական վարույթի մասին» օրենքի 50-րդ հոդվածի 2-րդ մասի բ) կետը՝ Հեռուստատեսության և ռադիոյի հանձնաժողովը **որոշեց.**

1. Կարճել «ՌԱԴԻՈ ԱՎՐՈՐԱ» ՍՊ ընկերության նկատմամբ հարուցված թիվ 3 վարչական վարույթը:

2. Սույն որոշումն ուժի մեջ է մտնում «ՌԱԴԻՈ ԱՎՐՈՐԱ» ՍՊ ընկերությանը պատշաճ ձևով հանձնելու օրվան հաջորդող օրվանից:

3. Սույն որոշումը կարող է բողոքարկվել ՀՀ վարչական դատարան՝ ուժի մեջ մտնելու օրվանից երկամսյա ժամկետում:

**ՀԵՌՈՒՍՏԱՏԵՍՈՒԹՅԱՆ ԵՎ ՌԱԴԻՈՑԻ
ՀԱՆՁՆԱԺՈՂՈՎԻ ՆԱԽԱԳԱՀ**

Տ. ՀԱԿՈԲՅԱՆ

16 ապրիլի 2021թ.

ք. Երևան